

Masovnije inicijativu

preuzeti



Građani Bosne i Hercegovine u nedjelju mogu osigurati suštinsku i pozitivnu političku promjenu, ali jedini način na koji se to može učiniti je ukoliko veliki broj građana odluči da iskoristi svoje demokratsko pravo, izađe na birališta i glasa, rekao je danas visoki predstavnik Valentin Inzko.

„Građani Bosne i Hercegovine u nedjelju imaju priliku da masovnije preuzmu inicijativu“, rekao je visoki predstavnik. „Ukoliko građani žele da se situacija popravi, a većina građana to želi, onda moraju izaći na birališta i glasati za kandidate za koje smatraju da će osigurati tu pozitivnu promjenu.“

„O sljedeće četiri godine odlučit će oni koji budu glasali, a ne oni koji ostanu kod kuće“, rekao je visoki predstavnik. „Ne biste pustili da drugi odlučuju o tome šta ćete obući, pa ne vidim razloga zašto biste drugima dozvolili da biraju ko će vas predstavljati u vladajućim strukturama?“, dodao je visoki predstavnik.

Visoki predstavnik je govorio na sastanku u OHR-a sa predstavnicima organizacija civilnog društva u BiH. Visoki predstavnik i prvi zamjenik visokog predstavnika David Robinson su sa sudionicima sastanka razgovarali o onome što nevladin sektor može učiniti u preostalim danima prije izbora kako bi ohrabrio građane da iskoriste svoje demokratsko pravo na glasanje.

Sastanku su prisustvovali predstavnici Centra civilnih inicijativa i Omladinske informativne agencije, u ime veće koalicije aktivista za ljudska prava „Pod lupom“. Prisustvovali su i predstavnici nevladine organizacije „Zašto ne“, Centra za promociju civilnog društva i predstavnici nevladine organizacije „Oštra nula“.

Sve ove organizacije se aktivno bave rješavanjem konkretnih problema s kojima se suočavaju građani Bosne i Hercegovine i pokazale su da, kada se građani udruže i preuzmu inicijativu, zaista mogu promijeniti stvari nabolje.